



夏日熱辣辣，有什麼地方是既慳錢又消暑，同時可以食好玩好呢？梗係有啦！本期慳妹帶大家去深水埗，到西九龍中心8樓花60元暢玩飛龍冰上樂園真雪溜冰場先，溜完冰出來就有冷麵和雪糕食，午餐51元搞掂；食飽飽之後去深水埗公園，免費玩水打水仗。跟住慳妹，一齊慳住玩轉夏日啦！

文、圖：黃新雅



# 平遊深水埗 食玩享清涼



■撈冷麵是童年味道。

和味冷麵

夏天沒食慾，不妨食點冰涼開胃的。這間和味冷麵同樣開在8樓，我們溜完冰出來轉個彎就能見到。店內有冷麵、米線、菠菜麵這三種主食，每包7元。小食每包4元，葷素同價，有螺肉、鵝鴨蛋、麻香海蜇、中華沙律、青瓜等約二十幾種食材。選好之後交由老闆一起倒進透明袋中，加入秘製醬汁攪拌，辣度和蒜量都可選，仲會撒上少少紫菜點綴。慳妹選了1包菠菜麵和6種小食，分量尚可。入口的感覺是酸酸辣辣，新鮮的食材搭配上濃郁惹味的醬汁，每一啖都是童年的味道。食完之後，慳妹發現這層樓不止一間冷麵店，更有一台冷麵自助機，冷麵控真係有得揀啦！

飛龍冰上樂園




位於西九龍中心8樓的飛龍冰上樂園是一間真雪溜冰場，面積達17,000平方呎，在這裏可以輕鬆享受冰上樂趣。溜冰場是分時段開放，入場費一律60元，慳妹當日由下午3時30分暢玩到夜晚8點，平均約16元玩一個鐘，超抵啊！付款後憑工作人員給的入場券就可以租用溜冰鞋，有尺碼對照表讓大家選擇尺碼合適的溜冰鞋，不然好易出現腳踝扭傷或摔倒的情況。場內除了租鞋處，還有儲物櫃與自助售貨機，販賣手套、襪子、護臀墊，以及一些零食飲品等，十

分方便。甫一踏上冰面，瞬間就感覺到溫度降低，肉眼可見有白霧，讓整個溜冰場變得好夢幻。冰面十分堅硬平整，大家可在此盡情展現冰上技巧，不過慳妹就害怕摔倒，只敢沿住邊緣慢慢滑。場內還專門劃分出一塊區域，供人玩冰上曲棍球。

除了嘆冷氣，這裏仲有懷舊主題打卡位。「Sky Rink」的字樣在牆上閃爍，盤旋於商場頂層的「天龍過山車」軌道從溜冰場中穿過，好似一條金色巨龍。由於軌道荒廢多年，其上已經鏽跡斑斑，莫名增添了復古感。

■飛龍冰上樂園好復古。



雪糕達人

深水埗公園

雪糕與夏天絕配，不過邊度可以買到平價又好食的雪糕呢？其實我們由和味冷麵再轉個彎，就見到這間雪糕達人啦，真係一層樓搞掂食玩啊。店舖外貼滿各式產品，包括雪糕、糖水、手搖茶、果汁、奶昔等，價錢都好平。慳妹就點了16元5個的自選雪糕球組合，特

別口味如海鹽地球、頂級榴槤、王牌乳酪、芝士繽紛等需要另外加錢。16元就可以食到5種口味的一大碗雪糕，性價比冇得輸，色彩斑斕，承包你一整天的好心情。味道方面，慳妹就推薦地道綠茶，不會好甜，茶味也很濃郁，絲毫不輸要加錢的口味！



■16元可選5種口味的小球。

■雪糕達人有超多產品。

熱辣辣的天氣，當然要玩水啦！大家知唔知深水埗公園可以玩水呢？來到公園兒童遊樂場的「綠洲噴泉」區，這裏有一個「噴泉樂園」，好多設施外表平平無奇，其實都是可以互動的。比如「鯨魚噴泉」，按掣之後頭頂瞬間噴出約一米高的水柱，好似真的鯨魚在呼吸。而「八爪魚噴泉」同樣也是按機關啟動，由八爪魚嘴部源源不斷噴出水流，之後匯聚到由鏤空管道和小盆模擬的八爪魚腿部。小朋友們可以輕鬆從盆裏取水，玩水槍打水仗。旁邊的「嬉水

感官牆」童趣十足，原來是根據小朋友的創作為靈感設計的。整面牆如同一個繽紛多彩的海底世界，有海龜、海馬、海星、龍等卡通小動物，高低兩個噴水口，令不同身高的小朋友都能沉浸在玩水中。除了玩水，兒童遊樂場還有攀爬繩網、鞦韆、滑梯、彈床等設施，更有一片沙池可以堆沙堡，可玩一整天。



■八爪魚噴泉



■「嬉水感官牆」繽紛多彩。